

Política Komunitade no Harii-Dame iha Timor Leste

Alex Gusmão ho M. Anne Brown¹

Depois konfliktu violénsia ida iha períodu naruk hanesan Timor Leste husik hela esperiénsia sosiedade ida ne'ebé iha risku boot atu monu ba divizaun entre grupu sira, fiar ba malu menus entre ema, no bele hamosu tan fali konfliktu foun. Dala barak buat hirak ne'e relasaun ho problema pasadu ne'ebé seidak konsege rezolve. Esperiência Timor Leste nian kona-ba konfliktu balun iha tinan hirak liu ba bele haree iha kontestu ida ne'e.

Termu Harii-Dame ne'ebé uza iha ne'e atu esplika servisu oioin ne'ebé ita hanesan membru komunitade halo atu hadi'a fali ka harii fali política komunitade nian (iha kontestu luan) iha tempu ne'ebé susar tebes iha ita-nia moris. Bainhira ko'alia kona-ba harii-dame, ita ko'alia kona-ba harii hikas ponte balun hodi tutan fali divizaun sira, harii fali nosaun ida ne'ebé bele moris hamutuk fali ne'ebé livre hosi violénsia boot sira no bele servisu hamutuk atu to'o ba iha objetivu fundamentál katak moris sosiál ida ne'ebé di'ak iha kualkér ambiente ida ne'ebé ita moris no hala'o servisu ba. Ida ne'e la dehan katak laiha konfliktu ka desintendementu ruma, maibé konfliktu ka diferenzia hirak ne'ebé karik sei mosu, sei lalori ema ba violénsia ida ne'ebé boot liu tantu direta ka indireta.

Nosaun ne'ebé halo parte iha komunitade ida no moris iha hamutuk tenke hafalun ema hotu iha nasaun ida nia laran – iha rejiaun sira ne'ebé lahanesan, iha fatin sira ne'ebé nia dalen sira lahanesan, ba sira ne'ebé liuhosi ona edukasaun formál, no sira ne'ebé la liuhosi edukasaun formál, ema hirak ne'ebé moris iha área rurál sira no mós sira ne'ebé moris iha sidade. Tanba ne'e bainhira temi kona-ba Política Komunitade no moris hakmatek ne'ebé iha nasaun Timor Leste ne'e, inklui governu no knua hirak hotu ne'ebé hale'u iha Timor laran tomak.

Iha Timor Leste, Timoroan sira mós forma hela dadaun nasaun independénsia ida foun, ida ne'e atu dehan katak Timoroan sira iha hela prosesu laran harii pás, no harii nasaun ida ne'ebé kesi ba malu (inter-ligadu) – ne'ebé buka daudaun hela dalan atu kria moris ida iha dame nia laran iha teritoriu tomak ne'ebé ema hotu-hotu hamutuk hodi determina sira-nia futuru rasik.

Harii foun ka harii fali nosaun política komunitade nian, ka sentimentu ida katak ita ne'e hosi ABUT ida, ne'ebé hakarak moris iha hakmatek laran iha nasaun ida ne'e, bele sai hanesan ponte ida hodi liga fali divizaun hirak iha rai laran ne'e. Hanoin ida ne'e hamosu hahusuk importante mai ita mak: Oinsá ema kompriende kona-ba nosaun Política komunitade; saida mak sira-nia hanoin kona-ba moris hamutuk ho di'ak? Hahusuk sira ne'e bele husu, no bele responde, iha nivel oioin – saida maka ema nia hanoin bainhira ko'alia kona-ba política komunitade iha nivel knua sira, no iha sidade sira iha Timor Leste laran tomak.

'Abut' sira Balun hodi Harii Nasaun nian

Dezde ukun-rasik-an, ema timoroan sira mak hamriik iha oin ka fó apoiu iha pozisaun sira, servisu hamutuk ho komunitade internasionál, tau esforsu boot hodi estabelese governu ho instituisaun xave sira – sistema eleitorál, ministériu justisa, edukasaun, saúde no sira seluk. Governu sai hanesan parte fundamentál ba nasaun ida ukun-rasik-an, no ba pás no moris di'ak. Komunitade internasionál mós halo esforsu koko atu fó apoiu ba pás liuhosi harii estrutura sira estadu nian. Estrutura sira governu nian importante tebes no iha Timoroan sira barak bele aprende barak hosi sosiedade no nasaun sira seluk kona-ba oinsá organizasaun sira ne'e bele servisu hamutuk di'ak liu.

Maibé, bainhira kuandu esforsu hirak ne'ebé atu transfere estrutura sira instituisaun seluk hosi fatin seluk ho lalais liu, moris komunitade ida ne'ebé nia abut kle'an iha rai ida ne'e bele naksobu tiha. Iha perigu bainhira koko atu harii lian no estrutura política moris nian ne'ebé valoriza ema lubun oan ida de'it ka sira lubun oan de'it ne'e mak sente hanesan sira-nia nasaun, no husik sira lubun boot ida sai

¹ Universidade Queensland

entrajeiru iha sira-nia rai rasik. Relatoiru sira hanesan hosi The International Work Group for Indegenious Affaris (IWGIA, 2002), hato'õ mai ita tendensia ida ne'e iha nasaun barak iha raiklaran ne'e.

Ami hakarak atu fó sujestaun katak estrutura sira governu nian halo parte ida hosi figura polítika comunidade nian. Política comunidade kona-ba oinsá ita bele moris hamutuk, halo hamutuk desizaun sira kona-ba ita-nia moris hamutuk, no servisu hamutuk ba to'o iha objetivu komun katak moris sosiál ida ne'ebé di'ak no hakmatek. Governu halo ninia papél fundamentál iha prosesu ida ne'e, maibé la signifika katak governu tenke halo/trata sasaen sira ne'e mesak-mesak de'it. Ba nasaun ida ne'ebé de'it, lejitimasaun no efikás governu ida la bazeia tomak de'it ba governu, maibé buat ne'ebé importante mak abilidade atu tutan relasaun ida luan no kle'an ba norma no valór sira sosiál nian – tanba ida ne'e mak importante ba ema, oinsá sira bele kompriende sira-nia an no ema seluk, ne'ebé halo parte iha polítika comunidade nian. Ida ne'e mak ita dehan demokrasia, tanba demokrasia ne'e nu'udar ponte ida hodi liga entre ema no governu, ida ne'e mak fundamentál liu. Ema la'ós hanesan 'surat tahan mutin ida'- maibé ema ididak halo parte ona grupu ne'ebé moris hosi kultura no família no fiar sira.

Tanba ne'e, ita presiza tau konsiderasaun kle'an ba ita-nia kultura, tradisaun no valór sira bainhira ita hanoin kona-ba polítika comunidade no governu iha Timor Leste. Saida maka bele sai hanesan kontribuisaun hosi kultura lokál no comunidade ba iha moris hamutuk ida iha pás nia laran, oinsá ita bele harii nasaun sira koletivu nian ne'ebé ita hotu bele halo parte iha laran.

Uma Lulik ho Ninia Relasaun ba Moris Komunitade

Lihosi asaun ami nian ne'ebé ba vizita no hela hamutuk ho comunidade sira kuaze iha distritu sira hotu, ami aprende lisaun barak hosi sira. Lisaun boot ida ami aprende mak depois ukun rasik-an ne'e, iha esforsu lubuk boot tebes hosi comunidade rasik ne'ebé hala'o fila hikas sira-nia pratika hirak tradisionál nian durante tinan ualu (8) nia laran. Fenomena ida ne'e atu dehan mai ita katak iha buat ruma ne'ebé importante tebes.

Ita bele husu pergunta ruma relasiona ho Uma-Lulik: saida maka papél Uma-Lulik sira iha Timor Leste? Prosesu saida maka comunidade uza atu harii fali sira-nia Uma-Lulik sira? Oinsá membru comunidade sira hadi'a fali divizaun hirak iha pasadu? Oinsá sira hamosu nasaun ida ne'ebé bele moris hamutuk no oinsá pratika sira ne'e bele hametin pás iha sira-nia leet?

Nasaun moris iha hakmatek laran iha TL (liuliu iha comunidade nia leet) la'os de'it inklui buat ida ne'ebé fiziku no mundu ne'e nian, maibé mós ho mundu sira seluk hanesan matebian sira ne'ebé sai hanesan 'hun' ba ema-nia moris hakmatek nian, kbi'it natural ida no espíritu sira ne'ebé ita la haree. Ema balun iha ami-nia soru-mutu sira hateten katak comunidade tenke hahú hosi ema sira ne'ebé mate ona. Pergunta ida mosu mak ne'e: folin ka lae (importante ka lae), nu'udar nasaun ida ita tenke buka dalan ida atu fó rekoñesimentu ba inan-aman no oan sira, maun no feton sira, ne'ebé mate ona durante iha funu laran?

Buat ne'ebé halo ami no ema balun hakfoda no admira mak semangat ema hirak ne'ebé kuaze la iha rekursu, dala barak sira la'o ain-tanan iha kilómetru barak nia laran no difisil tebes atu to'o ba iha sira-nia uma fatin uluk nian hodi harii fali sira-nia Uma Lulik sira iha ne'ebá. Iha fatin balun interesadu tebes, sira harii uluk Uma-Lulik sira molok sira harii eskola no igreja. Atu harii fali sira-nia Uma Lulik lori tempu naruk no envolve kuaze membru hotu iha knua ne'e nia laran - dala barak mós envolve kuaze ema atus ba atus durante semana ida nia laran ka resin. Uma-Lulik, tuir tradisaun tau sasaen lulik sira, inklui sasaen hirak hosi ema ididak ne'ebé mate ona, hanesan bikan, kanuru, kohe no buat seluk tan. Sasaen sira ne'e la limita de'it ba ema boot sira, maibé inklui mós labarik no feto sira. Iha knua balun, família sira lori sasaen lulik sira ne'e durante okupasaun nia tempu. Sasaen lulik hirak ne'e, sira lori durante tinan 25 nia laran, no balun iha tinan hirak liu ba mak sira ba tau fali iha Uma-Lulik hirak ne'ebé sira harii fali ona.

Harii Uma-Lulik halo parte hosi arte ida. Iha prosesu ida naruk, hosi etape ba etape. Knua ididak iha sira-nia lala'ok bainhira harii fali sira-nia Uma-Lulik. Elementu ida komun ne'ebé iha Uma-Lulik maka Uma-Lulik ne'e sai nu'udar 'Sentru' ida hodi halibur fali ema sira ne'ebe sei moris no ema sira ne'ebé mate tiha ona. Ema hirak ne'ebe halibur hamutuk iha Uma-Lulik lori hikas fali matebian sira ba fali iha sira-nia Uma Lulik ididak. Sira bolu fila fali espíritu ema sira ne'ebé mate hela iha ai-laran mai hamutuk fali iha Uma-Lulik ne'e.

Maiske ema balun ladun apresia ka ladun fo valor, maibe hahalok ida ne'e importante tebes iha perspektivu unidade no pás nian. Hahalok hirak ne'e nu'udar esforsu boot ida hodi harii hikas fali relasaun entre ema sira ne'ebé sei moris no dala barak bele lori hamutuk família sira iha pasadu fahe malu

tanba funu, ka tanba jerasaun ne'e fahe malu kleur ona, ka naruk liu ona (kala jerasaun too ona dalas hitu).
Bainhira ami dadalia ho madre sira balun iha Aileu, sira fo sasin mai ami:

‘Iha Uma Lulik laran, ema hotu hasees tiha sira-nia problema pasadu ...
ema mai hamutuk no sira hasoru malu no hatene malu, sira ne'e da'et ba malu
ho seseen de'it’ (Intervista ho Madre iha Aileu, 2007).

Hari fali Uma Lulik sira hanesan dalan importante ida atu kasu tiha todan no buat hirak ne'ebé lakon iha tinan barak liuba, ka servisu ho pasadu sira ne'ebé mak funu sobu rahun tiha no harii fila fali komunidadade. Ida ne'e importante tebes no presiza ita tenke kompriende iha kontestu harii nasaun ida.

Tara-Bandu: Hametin Orden no Pás iha Komunidadade

Iha mós pratika tradisionál balun hanesan Tara-Bandu ne'ebé ema tau atensaun boot iha fatin barak Timor Leste nian. Liu hosi Tara-Bandu ida ne'e membru komunidadade sira hakotu sira-nia lia hodi bandu sasaen ka relasaun balun ne'ebé sira la bele halo durante periodu ida nia laran ka iha período tomak iha sira-nia moris. Kona-ba niania tempu depende ba bandu saida maka sira hakarak atu halo.

Akordu ida ne'e bele kobre kategoria oioin iha komunidadade sira-nia moris. Iha fatin balun Tara-Bandu hodi halo jestaun ho rekursu sira lokál nian (iha ne'ebé no bainhira sira bele tesi ka la bele tesi ai, hamoos rai atu halo to'os foun no buat sira seluk tan). Iha akordu sira hakotu-lia hodi fó direksaun ba sira kona-ba ai saida de'it mak sira bele tesi no ai sira ne'ebé mak ema la bele tesi bainhira seidauk to'o nia tempu. Kuandu mosu problema ruma relasaun ho ai horis hirak iha ema ididak nia kintal, sira uza akordu hanesan mata-dalan hodi tesi sira nia lia.

Iha fatin seluk Tara-Bandu kobre mós kona-ba relasaun hirak entre ema nian. Sira Tara-Bandu hodi hasees no hadook hahalok violénsia entre sira. Purezemplu, sira mós regula bainhira iha fetoraan ida ka mane-klosan ida hakarak tuir malu, la naran tuir malu ba iha ai-laran iha fatin naran de'it, maybe tenke iha fatin ida apropiadu. Tara-Bandu mós evita hahalok violénsia sira hanesan baku malu entre foin-sa'e sira nune'e mos membru komunidadade sira seluk.

Iha komunidadade balun aplika Tara-Bandu atu halo mudansa ba pratika sira tradisionál nian ne'ebé ema barak haree hanesan presaan, no muda fali ba pratika sira ne'ebé fó benefísiu ba komunidadade. Iha fatin balun hanesan iha Ermera, Tara-Bandu aplika hodi limita obrigasaun ritúál sira ne'ebé parte Umane sira husu barlake boot liu hosi parte Fetosaa sira. Umane hodi forsa kultura nian ‘haka’as’ fetosaa sira atu lori saida mak umane sira sira husu, liuliu bainhira relasaun ho Barlake.

Iha fatin seluk, hanesan fatin iha Baucau (Triloka, Ostiku, Loilubu) agrikultór sira uza Tara-Bandu hodi halo jestaun ba produtu agrikultura nian. Sira aplika ritual Tara-Bandu hodi bandu ema la foti ai-fuan balun hanesan kamii, nuu ka ai-horis sira seluk molok ai-horis hirak nia tempu to'o atu ku'u ka hili nia fuan sira. Hahalok ida ne'e fó benefísiu ba agrikultór hodi halibur sira-nia produtu iha numeru ne'ebé sufisiente atu haruka (importa) ba rai li'ur.

Tara-Bandu mós hodi evita na'ok-teen sira, ne'ebé dala ruma sira foti ema nia sasaen ho razaun barbarak. Iha komunidadade balun Tara-Bandu hamenus numere ema halo krime. Purezemplu, iha komunidadade balun iha Venilale, bainhira ami dadalia ho membru polisa balun (intervista iha 2007), sira hato'o katak impaktu Tara-Bandu positivu ba komunidadade. Sira kalkula krime noviolénsia doméstika, redus to'o 50% bainhira aplika Tara-Bandu dezde tinan barak liu ba iha fatin ne'e. Komunidadade sira transforma sira-nia kostume sira ne'ebé potenciál hodi jere sira-nia moris komunidadade nian, no iha tempu hanesan autoridade tradisionál sira halo ligasaun ho sosiedade sivil no ajénsia sira ‘modernu’ nian ho hanoin/ideia sira foun.

Iha fatin balun sira seidauk bele aplika, tanba sira-nia Uma-Lulik seidauk harii fali. Tanba aspetu Tara-Bandu iha fatin balun hanesan iha Suku Caicua (intervista ho Xefi Suku, 2007) tenke liga ho Uma-Lulik. Tara-Bandu ba sira la'ós de'it liga ba objetu sira ne'ebé bele haree, maibé mós liga mós ho objetu sira ne'ebé sira la haree. Tara-Bandu hanesan iha suku Caicua, iha tempu molok invazaun, nu'udar asaun ida ne'ebé halulik sasaen sira balun hodi bandu ema la bele foti iha período ida nia laran. Kuandu membru komunidadade ida maka foti sasaen sira bele hetan kastigu oioin, sira bele sasaun ne'ebé regula iha Bandu ne'e, nomos sasaun super-natural nian ne'ebé sira ka sira-nia oan no bei-oan sira bele hetan iha tempu naruk nian.

Inisiativa Tara bandu ne'e, iha fatin balun hanesan iha Distritu Manufahi (Betano) ONG nasonál balun envolve iha laran hodi fasilita sira. Seremonia Tara-Bandu iha Betano, purezempu, inklui representante governu rejionál no sentrá nian, ne'ebé ko'alia positivu tebes kona-ba akordu sira hosi Tara-Bandu nian. Representante ofisial governu sentrá hosi ministériu ne'ebé responsabel ba meu-ambiente nian rekoñese katak governu laiha kapasidade atu hala'o monitorizasaun ba lei sira meu-ambiente nian. Inisiativa sira lokál nian hanesan Tara-Bandu nian, maka konsege hala'o bandu (porezemplu bandu tesi ai ilegál) ka hametin desizaun sira comunidade ka nasonál ne'ebé relaciona uzu rekursu sira.

Iha tendensia hosi governasaun nasaun nian no nia mekanizmu sira iha judisiáriu nian, dala barak hatudu menus kolaborasaun no partisipasaun inisiativa kostumariu sira lokál nian no hateke tuun tiha pratika tradisaun hirak ne'ebé signifika tebes iha ema nia moris. Maibé bainhira ita haree kle'an liu tan, pratika hirak ne'e la'ós de'it buat simbóliku nian, maibé mós liga ba pratika hirak ne'e bele aplika iha dalan ida ne'ebé prátiiku tebetebes, hanesan iha estrutura governasaun lokál nian, justisa, polisia, lei sira kona-ba rai nian, no norma sira atu evita hahalok ema balun nian ne'ebé bele hamosu konfliktu.

Iha ami nia dadalia sira, nune'e mos iha relatoriu sira hanesan hosi Globalism Research Centre (Grenfell, 2008), hatudu katak iha área seguransa no justisa nian, maiske polisia sira nia prezensa kuaze iha nasaun laran tomak, maibé lei báziku no funsaun sira orden nian, nafatin aplika mekanizmu comunidade nian. Polisia sira dalabarak iha área rurál sira bainhira hasoru problema iha comunidade sira-nia leet, sira entrega ba autoridade sira tradisional nian. Justisa formál nian susar tebetebes atu kompriende, liuliu ba maioria ema ki'ik sira iha kraik (baze), justisa formál mós karu liu, dook tebetebes hosi sira-nia hela fatin no mós iha problema barak relasaun ho língua ne'ebé uza iha prosesu ne'e. Iha nivel lokál ka iha area rural nian, ita bele dehan katak iha konsisténcia aplika justisa nian, tanba se iha problema ruma relasaun ho jestaun rekursu, disputa ruma, buat ruma ne'ebé lamonu ba iha membru comunidade balun nia laran, akontese krime ruma, pelumenu, comunidade sei tau matan lesuk. Maioria autoridade kustumariu sira no ema ne'ebé boot iha uma kain ne'e nia laran envolve ativu iha prosesu ne'e.

Iha ami-nia dadalia hirak ne'ebe halo ho membru sira comunidade koresponde ho relatoriu sira balun hanesan hosi The Asia Foundation iha tinan 2004 no 2008 nian, hatudu mai ita katak ema barak liu iha área rurál TL nian prefere liu tesi sira-nia problema liuhosi mekanizmu kostumáriu nian, duke ba polisia (maiske krime sériu nian labele rezolve uza lei kostumariu). Preferénsia ida ne'e la buka atu halo reflesaun ida simples ne'ebé hodi hateke ba de'it limitasaun rekursu iha sistema judisiáriu nian, preferénsia ne'e ba iha sistema justisa kostumariu nian rasik. Maiske sei iha problema balun, maibé aprosimasaun lei kostumáriu nian bele haree hanesan buat ida konkretu, ema bele asesu ba, no efikás. Liután ida ne'e, kostumáriu sira mantein nafatin relasaun sira comunidade nian no tulun hametin nafatin konsisténcia vizaun sira-nian kona-ba sira-nia mundu nian.

Kapasidade sira lokál nian ba justisa no kontrola-an mesak (sai polisia ba an rasik-hanesan pratika Tara-Bandu) mak rekursu boot hirak ne'ebé estadu bele utiliza ho kreativamente. Komunitade sira mós bele utiliza duni pratika sira ne'e, nune'e mós polítiku na'in sira. Ezemplu balun iha nivel comunidade nian, molok hala'o eleisaun, sira uza pratika sira tradisionál nian hodi diskute oinsá atu hala'o eleisaun la ho violénsia, no sira konsege duni halo ida ne'e no fó kontribusaun boot ba prosesu demokrasia iha rai ne'e. Iha nivel nasonál nian, purezemplu, iha tinan 2006 loron 10 Dezembru, Presidente Republika, momentu ne'e Sr. Xanana Gusmao, halibur hamutuk Lia-Nain sira kuaze hosi distritu hotu, mai iha Palacio Governo, hodi halo juramentu ba moris ida hakmatek nian. Ita labele klaim katak hahalok ida ne'e fó kedas rezultadu, maibe depois ida ne'e, iha indikasaun diak, ne'ebé iha fatin balun iha Dili konsege duni evita ka reduz violénsia durante problema boot Lorosa'e ho Loromonu mosu.

Konklusaun: Presiza Hanoin Naruk no Nakloke-an iha Futuru

Hanesan mensiona iha leten katak iha tendensia ne'ebé governasaun estadu no mekanizmu sira judisiáriu nian, dala barak ladún servisu hamutuk ho inisiativa kostumariu lokál nian. Dala ruma ema haluha tiha katak kostumariu no governasaun comunidade no mekanizmu sira judisiáriu mak sai hanesan ABUT hodi kesi metin comunidade. Tanba ne'e, bainhira hateke tuun sira, bele hamihis kohesaun comunidade nian. Bainhira menus koneksaun no partisipasaun pratika sira kostumariu lokál ho polítika instituisaun governu nian bele lori ema ba konfuzaun barak tanba ema sira iha lokál nian iha ona maneira oioin atu problema sira bainhira mosu, hanesan oinsá jere rekursu sira, rai no justisa. Iha tempu hanesan, instituisaun governu rasik ninia rekursu la sufisiente atu too ba iha comunidade sira iha rai laran tomak liuliu sira ne'ebé hela iha area rurál ni foho leten sira ne'ebá.

Harii fila mekanizmu sira governasaun kostumáriu nian, hanesan Uma-Lulik no Tara-Bandu, hatudu momoos katak ema Timoroan sira baibain servisu daudaun hela ona atu toman sira-nia responsabilidade rasik ba sira-nia situasaun ne'ebé bele fó benefisiu ba moris ema barak nian – hanesan iha sira-nia orden sosiál, sira-nia meu-ambiente ida ne'ebé naturál nian, sira-nia relasaun ho ABUT moris no arti sira moris ida ne'e nian, justisa, rekonsiliaun no bele kura/hadi'a laran moras sira balun ne'ebé mosu iha pasadu. Loos duni katak, lahaluha atu temi papel igreja nian iha prosesu ida ne'e. Timoroan sira haksolok atu simu tulun hosi ne'ebé de'it, maibé sira mós servisu maka'as daudaun hela atu harii fila fali sira-nia comunidade rasik, orden sosiál nian no harmonia. Ema kuaze hotu hakarak halo ida ne'e hamutuk ho instituisaun sira, la'os atu kontra hasoru fali instituisaun sira.

Maiske nune'e, ita preziza rekoñese katak, dalan atu halo koneksaun entre instituisaun sira estadu nian no kostumariu ka governasaun comunidade nian la'ós fasil. Laran todan ida ba iha valór no pratika sira tradisionál nu'udar polítika comunidade nian mak dala barak tradisaun sira kultura konservativu liu, no liuliu tradisaun ne'e diskrimina feto no labarik sira. Kritika barak ba pratika kustumáriu, hanesan violénsia ka marjinalizasaun feto, loos duni katak bele sai problema ho instituisaun estadu nian, hanesan polisia. Maibé kultura no kustumáriu ne'e moris no la'o ba oin tanba nia halo parte moris loroloron ema nian. Mudansa sira balun ne'ebe relasaun ho Tara-Bandu nian iha rejiaun balun hatudu ida ne'e. Se taka matan ba pratika sira ne'e, sei husik sira lakon. Foti-as no hametin direitu feto no labarik sira importante tebetebes, maibé ida ne'e labele sai hanesan rasaun ida atu hasees tiha ka ignora tiha kultura ne'e. Tanba ne'e, ezije instituisaun sira governu nian atu kolabora di'ak liután ho kultura no kostume no ema nia moris loroloron nian iha rai laran tomak.

Harii nasaun ida ne'ebe halo ema la sente hanesan iha sira-nia uma rasik, no sira rasik la ko'alia ka la kompriende 'Lian' sira ofisial nian, ne'e la'ós dalan di'ak atu ba to'o iha pás, demokrasia, no dezvoltamentu. Bainhira mosu divizaun entre governu no comunidade sira, entre sidade no rurál sira bele sai hanesan dezafiu boot ba pas sosiál nian, governasaun ida di'ak, no partisipasaun demokrátiku ida. Harii instituisaun governu ida hodi haketak-an hosi moris loroloron povu nian, la to'o atu responde ba problema sira mosu iha sociedade. Tanba ne'e importante tebetebes atu konsidera papel kustumáriu ne'ebé iha signifikadu boot ba moris ema nian no governasaun comunidade no kultura Timorensen nian hodi buka dalan ida ne'ebé posivel atu estrutura governu nian bele servisu ho positivu ho aprosimasaun lokál nian atu moris hamutuk ho pás.

Servisu ida ne'e karik la'o neineik, dala ruma la fasil ida, iha problema spesífiku balun ne'ebé difisil, inklui dezafiu autonomia feto nian. Maibé keta haluha katak problema sira hanesan ne'e iha mós iha governu laran. Se ita servisu atu harii polítika comunidade no estadu ida ne'ebé bele inklui ema hotu iha laran, ida ne'e bele lori dame to'o ba iha comunidade nia leet ne'ebé ema hotu bele servisu hamutuk atu too ba iha klima ida ema hotu bele fahe ba malu sira-nia nesiedade. Tanba ne'e ita preziza tau atensaun ba no servisu ho ita-nia riku-soin no diversidade ita kultura.

Ami rekoñese katak harii dame iha kontestu Timor Leste bele liuhosi dalan barak. Aspetu balun ne'ebé ami koko atu temi iha paper ida hanesan introdusaun de'it ba rikeza boot ne'ebé comunidade Timor Leste iha. Preziza peskiza kle'an liután iha futuru atu deskobre rikusoan sira ne'e kle'an liutan, hodi tulun haboot ita-nia kompriensaun ida kompriensivu iha prosesu determinasaun futuru nasaun ho povu ida ne'e. Hein katak ba oin harii nasaun ida ne'e, buka nafatin refilete ba rikusoan sira ne'e, atu tutan timoroan sira ho sira-nia pasadu la ho halerik bebeik, maibé valoriza sira-nia pasadu ne'e iha sira-nia moris agora nian no nafatin buka dalan sira ne'ebé konstrutivu ba determinasaun futuru povu rai doben ida ne'e.

Referensia

Grenfell D., 2008, *Community Sustainability and Security in Timor Leste: Sarelari and Nanu*, Globalism Research Centre, RMIT University with Oxfam and Concern Worldwide.
International Work Group Indigenous Affairs 2002, *The Indigenous World 2001/2002*, Copenhagen.
The Asia Foundation 2008, *A Survey of Citizen Awareness and Attitudes Regarding Law and Justice*, Dili.